

Bosna i Hercegovina
Federacija Bosne i Hercegovine
TUZLANSKI KANTON

KANTONALNI SUD U TUZLI

Broj: 003-0-Su-23-000 105

Datum, 12. januar 2024. godine

***STATISTIČKI IZVJEŠTAJ O POŠTIVANJU OPTIMALNIH I PREDVIDIVIH
ROKOVA U PERIODU OD 01.01.2023. GODINE DO 31.12.2023. GODINE***

U skladu sa članom 15. stav 1. Pravilnika o vremenskim okvirima za postupanje po predmetima u sudovima i tužilaštvima u Bosni i Hercegovini, a shodno Odluci o predvidivim rokovima Kantonalnog suda u Tuzli, dostavljamo Vam statistički izvještaj o poštivanju optimalnih i predvidivih rokova za period od 01.01.2023. godine do 31.12.2023. godine.

Analiza pokazatelja iz statističkog izvještaja o poštivanju optimalnih i predvidivih rokova:

Statistički izvještaj o poštivanju optimalnih i predvidivih rokova iz CMS-a dostavlja se u prilogu, obzirom da je isti u pdv formatu.

Analizom navedenih pokazatelja konstatovano je da je do prekoračenja predvidivih rokova došlo na referatu koji imaju najveći broj neriješenih predmeta i na kojem su sudije zadužene velikim brojem neriješenih predmeta koje se ne mogu iz objektivnih razloga svi staviti u rad. U Kantonalnom sudu u Tuzli na početku izvještajnog perioda tj. sa 01.01.2023. godine na svim referatima bilo je ukupno neriješenih 4.786 predmeta. U izvještajnom periodu, od 01.01.2023. godine do 31.12.2023. godine primljeno je na svim referatima 4.993 predmeta, tako da je ukupno u radu bilo 9.779 predmeta, što znači da su sve sudije u ovom periodu bile radno angažovane svaki bi sudija u prosjeku bio zadužen sa oko 325 predmeta. Međutim, zbog dugotrajnog postupka izbora novih sudija, a također i zbog odsustva nekih sudija usljed bolovanja, broj neriješenih predmeta nije se smanjio onako kako smo planirali. U periodu od 01.01.2023. godine do 31.12.2023. godine na svim referatima riješeno 5.133 predmeta i od tog broja u optimalnom roku riješeno je 1.745 predmeta, u predvidivom roku 4.088 predmeta i sa prekoračenjem predvidivog roka 1.045 predmeta i to u 872 drugostepena parnična predmeta, u 122 drugostepena predmeta po žalbi „Dn“, u 10 drugostepenih parničnih predmeta „Gvl“ i „Pvl“, u 23 prvostepena krivična predmeta „K“, te neznatno u trajanju od 1 – 4 dana u predmetima: postupka upisa u registar poslovnih subjekata, stečajni postupak po žalbi, postupak likvidacije i drugostepeni prekršajni postupak po žalbi.

Najveće prekoračenje predvidivog roka, kao i u prethodnim godinama došlo je u građanskim predmetima, a radi se o 872 parnična predmeta. Do ovog

prekoračenja došlo je zbog velikog opterećenja sudija koji su zaduženi sa velikim brojem neriješenih predmeta i svaki sudija na građanskom referatu zadužen je u prosjeku sa oko 220 predmeta, što predstavlja nešto veću godišnju normu svakog sudije koji radi na ovom referatu, bez priliva novih predmeta i objektivno zbog velikog broja predmeta ne mogu se ispoštovati predvidivi rokovi, iako je u odnosu na prethodne godine značajno smanjeno opterećenje sudije sa ukupnim brojem neriješenih predmeta, jer je došlo do povećanja broja sudija, ali istovremeno i do dužih odsustva sudija usljed bolovanja. Na ovom referatu do 31.12.2023 godine radilo je 18 sudija, s tim što je jedan sudija na ovaj referat raspoređen u mjesecu decembru 2023. godine nakon imenovanja, a troje sudija se nalazi već duži vremenski period na bolovanju.

Na prvostepenom krivičnom referatu došlo je do prekoračenja predvidivog roka u 23 predmeta, jer se radi o predmetima koji su složeni i u kojima krivični postupak zbog složenog dokaznog postupka traje duži vremenski period. U jednom broju ovih krivičnih predmeta, predmeti se zbog procesnih razloga ne mogu staviti u rad, jer su optužena lica nedostupna i protiv njih su raspisane potjernice. Prije svega radi se o predmetima ratnih zločina koji su zbog nedostupnosti optuženih lica blokirani i ne mogu se raditi. Na ovom referatu u 2023. godini radilo je 6 sudija, jer je šesti sudija izabran u mjesecu martu 2023. godine, s tim što je jedan sudija u mjesecu novembru 2023. godine otišao u penziju. Prioritet u radu imaju predmeti ratnih zločina, organizovanog kriminala i korupcije, te je intencija da se prioritetno uzimaju u rad predmeti u kojima postoje procesne pretpostavke da se u predmetu može suditi, pa u tim predmetima treba zakazivati glavni pretres i nastavke pretresa u što kraćim rokovima.

Na drugostepenom krivičnom referatu nije bilo prekoračenja predvidivog roka ni u jednom riješenom predmetu, a riješeno je u ovom periodu 535 predmeta, od čega je 326 predmeta riješeno u optimalnom roku, a 535 predmeta u predvidivom roku.

Na drugostepenom prekršajnom referatu sa prekoračenjem predvidivog roka riješen je 1 predmet od ukupno završenih 423 predmeta. Prekršajne predmete trenutno radi dvoje sudija i ovaj referat je izuzetno ažuran.

U ostalim vrstama sporova i to postupak upisa u registar poslovnih subjekata, rješavanje stečajnih predmeta po žalbi, postupak likvidacije i postupak po vanrednim pravnim lijekovima u sasvim neznatnom broju predmeta došlo je do prekoračenja predvidivog roka od ukupnog broja riješenih predmeta na tim referatima.

Broj neriješenih predmeta na kraju izvještajnog perioda je 4.646 predmeta, što znači da se povećao broj neriješenih predmeta za 140 predmeta u odnosu na početak godine i to iz razloga jer se povećao priliv drugostepenih parničnih predmeta radnog spora. Prosječno trajanje riješenih predmeta iznosi 405 dana, a prosječno trajanje neriješenih predmeta iznosi 299 dana, što predstavlja značajno smanjenje u odnosu na prethodnu godinu.

Problem predvidivih rokova ne bi bio toliko izražen da sudije rade samo zaostale neriješene predmete koji su određeni Odlukom o predvidivim rokovima sa danom 01. januar 2023. godine, ali problem postoji jer se predmeti u ovom sudu rješavaju prema Planu rješavanja predmeta, te ukoliko je predmet star i došao na rješavanje po žalbi u ovaj sud, uzima se odmah u rad, pa stoga postoji nesklad između Plana rješavanja predmeta i Odluke o predvidivim rokovima prema kojoj se predmeti trebaju uzimati u rad prema starosti inicijalnog akta kojim je pokrenut postupak pred ovim sudom.

Analiza raspoloživih resursa u sudu:

U Kantonalnom sudu u Tuzli u 2023. godini Visoko sudsko i tužilačko vijeće BiH imenovalo je 7 sudija koji su jednim dijelom zamjena za sudije koje su otišle u penziju, a drugim dijelom obezbjeđena su sredstva od strane Vlade Tuzlanskog kantona za popunjavanje sistematizacije ovog suda. Međutim, iako se povećao broj sudija u ovom sudu 4 sudija, a među kojima je i novoimenovani sudija, otišli su na bolovanje i od tog broja sudija 3 sudija su još uvijek na bolovanju, s tim što se jedan sudija vratio sa bolovanja u mjesecu novembru 2023. godine. Dugotrajna bolovanja su uticala na ukupan broj riješenih predmeta, jer da su sve sudije bile radno angažovane sigurno bi se značajno smanjio broj neriješenih predmeta na građanskom referatu, jer sudije koje se nalaze na bolovanju su raspoređene na taj referat.

U 2023. godini ovaj sud je vodio aktivnosti oko popunjavanja administrativno – tehničkog osoblja, te se značajno povećao broj daktilografa, bilo iz razloga zamjene za namještenike koji su otišli u penziju, ili iz razloga što je sud uspio obezbijediti sredstva za popunjavanje pozicija administrativno – tehničkog osoblja koje su upražnjene u sistematizaciji.

Posebno naglašavamo, da su sve sudije maksimalno angažovane na svojim referatima, te da u skladu sa donesenim Planom rješavanja predmeta rade stare predmete i dosljedno se pridržavaju tog plana, kao i Plana rješavanja stečajnih predmeta i predmeta proizašlih iz stečajnih postupaka, a o čemu govore rezultati koji su postignuti u realizaciji donesenih planova rješavanja.

Analiza „perioda neaktivnosti“ u predmetima:

U ovom izvještajnom periodu u Kantonalnom sudu u Tuzli je na snazi Plan rješavanja predmeta, te se u skladu s tim Planom sačinjavaju kvartalni planovi i predmeti dodjeljuju sudijama u rad prema starosti inicijalnog akta kojim je pokrenut postupak pred općinskim sudom i prema starosti faze kojom je predmet zaveden kod ovog suda. Također je na snazi Plan rješavanja stečajnih predmeta i predmeta proizašlih iz stečajnih postupaka i ovi predmeti kao hitni po zakonu prioritetno se uzimaju u rad. Predmeti u sudu su ravnomjerno raspoređeni na sve sudije, tako da su u pogledu ukupnog broja predmeta sudije ravnomjerno opterećene. U nekim prvostepenim krivičnim predmetima zbog raspisanih potjernica protiv optuženih lica, predmeti su neaktivni i ne mogu se raditi, tako da su u CMS ti predmeti određeni kao nerješivi. Na građanskom referatu i drugostepenom

krivičnom referatu, postoji opravdana neaktivnost rada na predmetima, jer sudije objektivno zbog velikog broja zaduženih predmeta i pritvorskih predmeta, ne mogu uzeti sve predmete u rad, jer 85% mjesečne norme isključivo rade stare predmete, a preostali dio norme od 15% pritvorske predmete, predmete nasilja u porodici, predmete stečaja, kao i ostale predmete po zakonu hitne prirode.

U građanskim predmetima, ali u neznatnom broju predmeta, postoji neaktivnost u predmetima, jer su predmeti od strane građanskog vijeća ovog suda, vraćeni prvostepenom sudu na izviđajne radnje prije odlučivanja o žalbi i takvi predmeti su u CMS sistemu označeni kao nerješivi.

Prijedlog mjera kako bi se utvrđeni predviđivi rokovi skraćivali i približavali optimalnim rokovima:

- Potrebno je izvršiti popunjavanje upražnjenih pozicija administrativno – tehničkog osoblja koje je u funkciji podrške rada sudijama, jer je značajan broj zaposlenika ove kategorije u ovoj godini otišao u penziju, a također će određen broj namještenika otići u penziju i u 2024. godini.
- Visoko sudsko i tužilačko vijeće BiH značajno je skratilo rokove za provođenje procedure izbora sudija, a što treba nastaviti i u narednom periodu, te prioritet prilikom izbora sudija dati sudovima koji imaju najveći broj neriješenih predmeta.
- Visoko sudsko i tužilačko vijeće BiH kada postoji mogućnost u skladu sa zakonom, treba koristiti institut delegacije sudija iz sudova koji su ažurni u sudove koji imaju veliki broj neriješenih predmeta, jer jedan dio kantonalnih sudova nemaju predmeta za rad, a sudije u tim sudovima nisu zainteresovane da budu delegirane na rad u drugi sud.

PREDSJEDNICA SUDA

Indira Hadžimehmedović